

بِسْمِ اللَّهِ الرَّحْمَنِ الرَّحِيمِ



الحمد لله رب العالمين، والصلاة والسلام على رسوله الكريم وعلى آله وصحبه أجمعين.

Sii sa hadapan o kalankapan a manga Insan.

So kalilintad a a go so kapipiya ginawa na san rkano langon a go so manga pamiliya niyo.

Ika dowan ini a Pando'an a piakambowat ami rkano a pda'i ko manga okit a kapzosiya tano ko manga ginawa tano sa pzomariyaan tano ko mapita magabi sa pantag sa kaphhananadm tano ka so kapananadm na phakanggay a gona ko miamaratiaya.

Gowani a nggkaan tano so ompongan a Insan ko paganay a masa niyan na tanto a mabagr so kopor o oman i isa a go so tgo niyan sa kapagompiya'i niyan ko masa a mabibinasa, sa ipagphoon iyan ko ginawa niyan so galbk a kaompiya na ithondog iyan on so pamiliya niyan (walay niyan) na go bo' so ingd iyan sa taman sa mapakatindg iyan so kaphagingd sa mindod iyan ko goliling o Islam.

Manga Insan, lomiagaday dn so manga ragon sa katii a inisampay tano sa 43 ragon. Madakl dn a miangawawafat rki tano a mindod sa kabaya' o Allah, na siran dn i pndolona' sa alongan a maori ko manga galbk iran ko doniya marata' sa mapiya.

Manga Insan, imanto na isipn tano so manga ginawa tano o nda tano matatago'. Ino da pn matnggaw so kayaw o kakokopor a go so kattgo o oman i isa rki tano? Antaa ka ba miphondaw dn so sorazab iyan ko manga ginawa tano ko miathay dn a masa?

Paliogat dn ko nggagaisa a kapananadm iyan, ka waraan o manosiya so kapakalipat a go so kidaplak sa pphakalobay so panagontaman a go so panizakay ko kaphlagaday o manga masa.

Adn a sakataw a Sahābī a pitharo' iyan ko Rasūlullāh ﷺ a:

Hay Rasulallah igira maaadn kami rka a pphangosiyatan kami nka na datar dn o ba ami kasasandngi so Sorga' a go so manga dayaan on, a go datar o ba ami kapprki so Naraka' a go so manga siksa' iyan, na anda i kabaling ami ko manga pamiliya mi sa panaliyaan kami o manga karoma a go so manga wata' ami, na pkhababasan so kagdam ami ko manga wasiyat ka. Na pitharo' o Rasūlullāh a: Hay Hanzalah, opama o

matatap kano ko maggdam iyo sa di kakorangan na mataan a phayagan kano o manga Malaikat na amongn kano iran ko manga igaan iyo. Hay Hanzalah, kambagobago aki!.

Manga Insan, giyanan so kambagobago ka waraan o ginawa so kaphrotosa on sa ipndaplak a go pkhatala' ko kapkhakowaa niyan ko dayaan ko doniya ko kadadangaa niyan ko manga kalombayan iyan a go so karoma niyan, so manga plano niyan ko kapmbalay sa manga mansion, so kaphamasa sa manga sisinaw a trak, so kazong ko manga darpa' a pndkhaan ko oman pito gawii ko manga tpik a ragat, a go so salakaw san.

Miaadn so Sahābī a mala' a so Hudayfah bin al Yamān, a aya lalayon a manga pakaiza' iyan ko Nabī ﷺ na so manga rarata' a phakaoma a btad ko manga Mulim ka kalk iyan sa oba niyan raota, a so manga Muslim na romarampi' siran ko langowan o pakaiza' a kapakakowa sa mapiya. Na simbag o Nabī ﷺ sa oway, phakaoma so kabinasaan anda i kandakl o marata' ko Itlt o manga Muslim.

So Mranaw a pd on so manga Insan na mapasang i kapangarati sa iphagona niyan dn so onga o galbk ko da niyan pn kaadn. Anda i kasold o mangoda ko kapaganad sa Engineering na tiawag dn a engineer, so somiold sa Law na tiawag dn a attorney, datar oto so simiombak sa madrasah a tiawag dn a alim, so kandidato sa mayor odi' na governor na tiawag dn a mayor a governor, misabap roo na miakasold so kapanakabor ko manga poso' na milawlanda' so manga taw sa lomiawan siran sa thipho'. Giyanan i btad o kalangkapan a Mranaw, ogaid na o sii ilaya ko kanggalbk sa mapiya a kaphroromasayan sa okit a galbk a mapn'd a go mala' a pirak, na di ron mapasang so Mranaw a pd on so manga Insan o ba on pphangarati sa mapiya, sabap san na pkhailay nka so galbk o Mranaw a pd on so manga Insan a aya kanggalbk iyan na sii bo' sa paganay sa mababaya' phoon na di khababaya' mimasad ko galbk iyan. Ilay anka so manga walay o Mranaw ka 80% ko manga walay na ba dn kiaphoonan na da mitaros, apiya so miapasad a walay, na sold ka on ka da mapasad so diamban iyan (toilet) odi' na miapasad so walay na da mapasad so manga pagalad iyan, so manga ompiya a datar o karsada a go so salakaw ron na ba dn kiaphoonan na da imasada, sa giyanan na rinayagan o waraan o pagtaw a toos anan sa di skaniyan khabaloy a pagtaw a magawid sa mapn'd a galbk ko doniya, na ba ana mapn'd a galbk a pnggalbk o manosiya a Muslim a ba niyan kalawani so kanggalbka ko Islam sa pantag sa katarotop o simba ko Allah ko liawaw o lopa'!

Miaadn so Insan a miromasay sa kapagmbaali niyan sa ginawa niyan a salakaw dn a mama sii ko kaphagingd sabap ko matatago' on a panamar sa kaompiya, na anda matataman imanto?

So kababaloy akn a isa ko manga ulama a Insan na piakathaman akn so panamar akn sa kiapagiasaa ko ko ginawa ko sa kapakala' a sabot akn ko Islam a go so btad o doniya sa

taman sa inisampay ako ko kiapanorat sa manga kitab ko pankat a da' a miakaona on, sa panagontaman akn sa o ba maoma so masa a kakhabaramaana o pagtaw a Muslim a pd on so manga Insan na makaogop ako ko kithoroon ko lalan a pagokitan o manga Muslim.

Imanto a masa na miakaoma so kiabaramaana o Muslim sa miromparompak dn ko lalakaw niyan sa kaphloba' iyan sa maana a mibnkas iyan ko awid a akal iyan a masasangat iyan sa sii sank'a'i a masa na paliogat ko manga taw a mndod siran ko manga ulama iran a kominal ko manga kokoman o agama ka an mikayas so kapaparampang iran ko manga galbk iran, ogaid na tanto a maito' a miakanggolawla san.

Miaadn so sabaad ko manga Insan a kialipatan iran a ginawa niran a go so ulama iran a go so Murshid iran a pthoro' ko lalan iran, sa mianarankoni siran sa salakaw a knal a go sabot ko paratiaya a go so btad o agama a go so doniya. Miaadn so Insan a khatoon ka on so romiampi' ko paratiaya a Ahl al Bayt, so romiampi' on ko paratiaya a Tasawwuf, so romiamig on ko paratiaya a Asha'irah, a go so manga pd a sabot a mababagombar sank'a'i a doniya a mizoramig on sa kpit a phkokomn iyan so kalankapan a Muslim sa manga kapid siran kon.

Piakammsa so btad o Insan imanto sii ko kialagaday o polo'an ragon ko kiapangnal ko Islam na giaya'i i miaonga niyan a kasagomparak sa tindg a giyaya i piakalkk a btad a gophoon misogat ko lompokan, na miakarani dn so kakhitabog iyan a datar o pasbi a khapitol so tog iyan na khabobos so od iyan sa da' a thontokan sa ganot iyan. Lomindong ano ko Allah ﷻ sa btad anan.

Giyanka'i a masa a somasagad na masa a kasagomparak sa tindg o pagtaw a Muslim, sa khailay nka a so pagtaw na pinggolima iran dn so Islam sa inagaw o manga taw a da' a manga sowa' iran so mimbar o manga masjid ko manga ulama sa miamangosiyat so da' a knal iyan ko Islam, sa miasagala so btad, sa miamagolama so da' a sowa' iyan, na miangokom so da' a plng iyan, na mimbaratapa so da' a mmntl iyan ko agama, sa miabankiring so btad sa datar o ba so lawasaig na somioba' so toga' iyan sa raya, sa palaya dn aya papata' ko kabinasa a go kaantiyor.

Giyankanan a btad na initoro' o Nabi ﷺ a phakaoma dn ko oriyen o masa, a khabatiya' iyo bo' so titayan iyan ko kaposan anka'i a sorat.

Antonaa i pnggolawlaan o Insan sank'a'i a mababaramaana a btad a katatago'an on?

Aya smbag san na pangndod so Insan ko asal a tindg iyan, sa kasowi niyan so itotolad a lalan a pagokitan iyan a go so galbk a pnggalbkn iyan.

Miakapira dn ragon so kinidakatn akn ko plano a pnggalbkn o Insan, ko kiapakadakl o pakaiza' o manga Inampda' o antonaa i pnggalbkn? na inisorat akn so onayan a pnggalbkn o Insan a so kaphangndaowa ko manga Muslim sa mabatiya' iran so Qur'an

ko kaat iyan a Arab, ka san matatago' so onayaan a bagr o Muslim a mikoyapt siran ko kitab o Allah a giyanan so mu'jizah (miracle) a o kpiti ran na khataban iran so doniya sa phakatindg so kadato' o Allah ko liawaw o lopa' na o bagakn iran na phagombasay siran sa kaantiyor sa phangongoripnn siran o manga ridoay ran sa datar o kamamasa'i ron imanto.

Da' a mala' a pnggalbkn o Insan a rowar san, ko oriyan o kiapagiyasaa ko labi magatos a bandingan o Khutbah a miarankom iyan so manga gonana'o o Islam.

Katii a miakarani pman so Kazold o ragon a 2015, na tanto a madakl a pphanawag ko Murshid sa khiphagizaan iran ko kapconvention ko kaposan o December, datar o ba aya bo' a kapakatitindg o Insan na pantag sa Convention, a da bo' a khaonga niyan a mala' a galbk ko Islam a rowar sa kaplalawana sa katas i katharo' a da' a onga niyan a phakambowat ko oriyan o kiaplimod o manga Insan.

Manga Insan di pkharata' a ginawa niyo sank'a'i a sorat o Murshid iyo a palaya kadaway sii ko manga ginawa tano, ka kiaokitan tano so manga pd a okit ko kabantoga ko ginawa a go so Ompongan ogaid na da' a miaragon on a mala' a laba o ompongan, na paliogat a kaalanan sa bonaw so kaphloto'a ko bibinka opama o ba tano phagiyaw sa bibinka sa apoyan sa mapiya ka an tano makalto' sa mapiya a galbk.

Manga Insan, mbagobago tano, sa iskl tano so Ompongan tano ka miamangitolod dn o manga omor tano na so gomagalbk on sa liyo a go so manga Insan sa sold a komakamal ko manga pangadapan o Parinta na magaan dn so kandkha' iran ko manga galbk iran (retirement) na ba amay ka kadaan sa kaoyagan so Insan na aya niyan kaphamikal sa phangmbaal sa pamoronan a khapoonan a kaoyagan iyan a ipagawid iyan ko Islam, opama o da makambaal ko kakhakawasa niyan sa galbk a mabagr na sii ko kakhammr iyan na mustahil o ba ana maporon iyan a mala' a galbk iyan. Pamakot kano sa galbk ko masa a kangongoda a pantag ko kaloks, so kapipiya ginawa a pantag ko kasasakit, so kaoyagoyag a pantag ko kapatay.

Manga Insan Pitharo' o Nabī ﷺ a:

إِنَّكُمْ أَصْبَحْتُمْ فِي زَمَنٍ كَثِيرٍ فَقَهَاؤُهُ ، فَلَيْلٌ قُرْأُوهُ وَخُطَبَاؤُهُ ، قَلِيلٌ سَأَلُوهُ ، كَثِيرٌ مُعْطُوهُ ، الْعَمَلُ فِيهِ خَيْرٌ مِنَ الْعِلْمِ ، وَسَيَأْتِي عَلَى النَّاسِ زَمَانٌ قَلِيلٌ فَقَهَاؤُهُ كَثِيرٌ خُطَبَاؤُهُ قَلِيلٌ مُعْطُوهُ ، كَثِيرٌ سَأَلُوهُ ، الْعِلْمُ فِيهِ خَيْرٌ مِنَ الْعَمَلِ . رَوَاهُ الطَّبْرَانِيُّ .

Mataan a miaadan kano sii sa masa a madakl so manga ulama on ko sabot ko manga kokoman, a maito' a pababatiya' on a go so manga pangongosiyat on, a maito' so manga taw a pphamangni ron, a madakl so manga taw a pphammgay ron sa sadka, so kanggalbk (sankanan a masa) na mapiya a di so kapakablang on o kata'o, na phakaoma

ko manga taw a masa a maito' so manga ulama on ko sabot ko manga kokoman, a madakl so manga pangongosiyat on, a maito' a pphammgay ron sa sadka, a madakl so manga taw a gii ron mamangni, so kapaganada ko kata'o ko agama sankoto a masa na aya lbi a mapiya a di so kanggalbk on. Pianothol o at Tabarani.

Giyankanan a hadith na iniropa niyan so mapmbtad o manga Muslim ko paganay a masa iran ko Islam ko katatago' kiran o Rasulullah ﷺ, a go so khaoriyan kiran a btad sa imanto na somasagad dn so kiapanagipoon o khaoriyan kiran a masa a mindakl so miamagulama. Sa miakaito' so sabot ko manga kokoman o Islam, sa aya dn a patot na makala' so sabot ko agama sa iona a di so kanggalbka on a rakhs a maada' so knal ko Islam, imanto na mapapato' ka madakl a Muslim a giinggalbk ko Islam ogaid na da' a sowa' on a mala' a aya khaonga oto na kadadag a go kabinasaan.

Manga Insan, pakabagr n tano so gakot o kanggiginawa'i ka mataan a miakalobay dn ko ltlit o manga Insan, sa aya bo' a zambi' na so kapthatalikhoda'. Manarig tano ko tali o Allah ﷻ a malamit a di khapotol.

Wassalam,



Hassanor bin Maka
al Murshid

20 November 2014